



Cussegli da vischraunca 27-2013/2016
Seduta dils 11 da decembre 2015

Protocol

dalla seduta dil cussegli da vischraunca,
venderdis, ils 11 da decembre 2015, allas 19⁰⁰ – 20⁴⁷
en casa da scola Segnas

Presidi: Edgar Durschei

Actuar: Ervin Maissen

Presents:

a) Cussegli	Armin Berther Christoph Berger Adrian Bigliel Silvio Candinas Adrian Deflorin Edgar Durschei Rita Huonder-Tenner Wendelin Jacomet	Jordana Lozza-Desax Armin Manetsch Flavio Murer Adrian Pally Alfred Spescha Rico Tuor Livio Zanetti
b) Suprastanza communalia	Francesg Cajacob Madlen Deflorin-Spescha Cecilia Maissen	Roger Tuor Iso Mazzetta
c) Referents	Andri Hendry, canzlist communal Herbert Schmelzer, meinafatschenta CSC	
d) Hospes	ca. 20 persunas	

"Jeu beneventel Vus alla ventgasiatavla seduta dalla perioda d'uffeci 2013/2016 cheu en casa da scola Segnas.

Strusch entschiet e gia ei in onn vargaus. Quei audan ins adina puspei. In onn varga bia memia spert per tut quei ch'ins ha previu da far. Tonaton ha ei dau differentas fatschentas che nus havein decidiu en quei onn ch'jeu hiel astgau presidiar il cussegl. Denter auter ei quei stau il dretg da baghegiar per la parcella sut Gliendas nua ch'ei dat habitaziuns adattadas alla vegliadetgna. La damonda da baghegiar ei veginada publicada oz. Unic ei segir che dus preventivs e dus plans da finanzas ein vegni approbabai quei onn. Cuntents e satisfatgs sundel era dallas decisiuns dil pievel, cunzun davart la donaziun per la sanaziun dalla baselgia claustral a dalla davosa votaziun nua che 85% dils votants han detg gie alla revisiun parziale dalla planisaziun locala.

Jeu engraziel grondmein a tut quels che han susteniu mei duront quei onn presidial en special al vicepresident Livio Zanetti.

Las sfidas che spetgan nus egl avegnir ein denton buca meins grondas. Aschia astgein nus era sedumendar sch'il liug per il center da fugitivs amiez il vitg ei il dretg liug. Il dretg liug vegin ei pli probabel buca a dar, denton ei la vischinanza tier la scola in fatg che caschuna fastedis a biara glieud. En discussiuns cun vischinas e vischins ha ei dau biaras damondas, las qualas muossan che la malsegirtad per il nunenconuscent ei gronda. Lein nezegiar la caschun e tschentar quellas a caschun dalla sera d'informazion mesjamna proxima.

Oz havein intervegniu ord las medias ch'il cantun Grischun vegli candidar per ils giugs olimpics d'unviern 2026. Niev enviers la candidatura per 2022 ei ch'ils giugs vegnissen reparti sur igl entir cantun ed era sur ils cunfins da lez ora. Tochen la fin schaner vul il comite presentar nua che quels giugs duessen haver liug. Jeu sperel fermamein ch'era la suprastanza communalia enquera immediat il contact cun il comite per seporscher cun ferma perschuasiun e clar maletg dad organisar in giug u l'auter. Per numnar entginas pusseivladads savess quei esser Skicross ni Boardercross ni cuorsas sin pista da bots (Buckelpiste) etc.. Ei dat massa pusseivlas occurrentzas ch'era nus savein organisar. Era havein nus cun il plan d'areal ad Acla da Fontauna il plaz ideal per construir letgs sche quels fussen buca gia en avunda grond diember avon maun. Aschia ina schanza vegin buca pli a seporscher aschi spert. Lein perquei nezegiar ella.

Dapi la davosa seduta dil cussegl da vischnaunca ha Toni Mathiuet-Panier da Cons, naschius ils 24 da fenadur 1939 e morts ils 25 da november 2015 bandunau il terrester.

El rruassi en pasch.

La gliesta da tractandas secloma sco suonda:

Tractandas:

1. Center da sport e cultura: Informaziun entras il niev meinafatschenta Herbert Schmelzer
2. Avertura dil quartier per indigens Caschuarz II: Credit (messadi nr. 36-2013/2016)
3. Agenda 2016
4. Ura da damondas (conform ad art. 44 dil regulativ da fatschentas)

5. Elecziuns:

5.1 dil president ni dalla presidenta dil cussegli da vischnaunca per 2016

5.2 dil vicepresident ni dalla vicepresidenta dil cussegli da vischnaunca
per 2016

Cussegli da vischnaunca Disentis/Mustér
Il president: Igl actuar:

Edgar Durschei

Ervin Maissen



1. Center da sport e cultura: Informaziun entrais il niev meinafatschenta Herbert Schmelzer

Herbert Schmelzer

Herbert Schmelzer ei dapi 100 dis meinafatschenta dil Center da sport e cultura. El ei staus surprius positivamein dalla purschida dil Center da sport e cultura cura ch'el ha astgau supreder quei menaschi. Surstaus ei el era dil svilup positiv dil menaschi e ch'igl ei el decuors digl atun – era grazia agl engaschi da siu antecessur – stau pusseivel d'augmentar pigl onn 2016 las reservaziuns per pernottaziuns per rodund 24%. La megliera reclama seigi quella che succeda da bucca tier bucca e quei contonsch'ins cun in bien andament dil menaschi.

Urgentamein necessari eis ei da remplazzar il mobiliar dallas hallas. Meisas e suppias ston vegni remplazzai urgentamein. La stad duess il kiosk el liber vegnir activaus. Per quei intent han giu liug discours cul club da tennis. La piazza da termagliar dil CSC cun ina purschida augmentada dil kiosk duei daventar in liug da sentupada per hospes ed indigens.

Il Center da sport e cultura gauda bien sustegn ella populaziun. Per las proximas jamnas ei previu in'acziun da reclama. Mintga casada vegn a retscheiver in bon per ina viseta gratuita el center da fitness..

Cussegli da vischnaunca

Il cussegli da vischnaunca desista da tschenttar damondas al referent.

Cussegli da vischnaunca Disentis/Mustér
Il president: Igl actuar:

Edgar Durschei

Ervin Maissen



2. Avertura dil quartier per indigens Caschuarz II: Credit (messadi nr. 36-2013/2016)

Suprastonza communal

En num dalla suprastonza communal ed a basa dil messadi nr. 36-2013/2016 presenta gerau Iso Mazzetta la fatschenta.

Enviers il messadi menziunescha el suandontas cumpletaziuns: Il diember da quater parcellas ei sedaus ord las damondas d'interessents. L'entschatta eran previdas tschun parcellas. La vischnaunca ha era schau sviluppar in studi da surbaghegiada e giu tschercau in institut bancar per la finanziaziun dil project. Deplorablamein eis ei buca stau pusseivel d'anflar in investur.

Actualmein disponan ins da dus interessents concrets. En in cass ei il contract en dretg da bagheggiar vegnius signaus, en l'auter cass ei la suttascripziun dil contract previda il schaner 2016. A vesta da quella situaziun ha la suprastonza communal reactivau il project d'avertura ch'era staus remess muort munconza d'interess. Cun quei project ha la vischnaunca la pusseivladad da sustener famiglias giuvnas che vulan secasar a Mustér.

Discussiun davart la debatta d'entrada

Cussegli da vischnaunca

Pil cussegli ei quella fatschenta buca dispoteivla. Entginas damondas san vegnir sclaridas en connex cun la discussiun da detagl.

Discussiun en detagi

Suprastonza communal

Il prezi dallas parcellas sebasa sin ils cuosts effectivs per la cumpra da terren. Vidlunder vegnan ils cuosts per l'avertura senza la canalisaziun. Ils cuosts per la canalisaziun vegnan engrevegiai alla finanziaziun speciala, canalisaziun e serenera.

Cussegli da vischnaunca

Las parcellas aunc venalas duein vegnir publicadas sin fiera cun indicar il prezi da cumpra. Auters investurs sil sectur immobilier fan era quei. Setracta ei tier quella via d'ina via da quartier privata? Co ei il survetsch d'unviern reglaus? Succeda quel era el cass che mo duas casas vegnan realisadas sin l'entira lunghezia dalla via? Eis ei el medem mument pusseivel da realiar il postulat per l'illuminaziun dalla Via Clis resp. dil tschancun denter Funs-Dado e Funs?

Apparentamein dispona la corporazion d'aua d'in project per serrar in tscherchel da provediment a Caschuarz? Eis ei pusseivel che quei project per in meglierament dalla qualitad dil provediment d'aua vegn realisaus en cumbinaziun cun la realisaziun dall'avertura dil quartier Caschuarz II?

Suprastonza communal

Tier quella via settracta ei d'ina via da quartier privata nua ch'ils vischins vegnan a stuer procurar il manteniment dalla via, sco era il survetsch d'unviern. Davart ils detagls co il survetsch d'unviern duei succeder ein ins aunc buca sefatschentaus. Denton eis ei aschia, ch'ins sto tenor situaziun buca rumir la via sin l'entira lunghezia sch'il basegns ei buca daus.

En connex cul provediment d'aua rispunda la suprastonza communalia ina damonda che cuseglier Flavio Murer ha tschentau a secret.

"La lingia da stumpy a Caschuarz era gia tier la corporaziun d'aua Clavaniev in tema. Leu muncavan denton ils mieds finanzials per la sligiazion ed ultra da quei havevan auters projects pli gronda prioritad, cunquei che nus havein alla finiziun dalla lingia in hidrant per derschentlar la lingia periodicamein.

La problematica da quella lingia da stumpy vegn denton effectivamein sligiada en connex cun il quartier da Caschuarz su (II) entras ina lingia da tscherchel. In credit corrispondent da frs. 70'000.-- ei gia vegnius concedius a caschun dalla radunanza generala dils **10 d'avrel 2012**. Las lavurs vegnan exequidas en connex cun l'avertura dil quartier (via, canalisaziun, aua). L'execuzion succeda pli u meins tenor il project da 2009.

La Corporaziun d'aua Spina da Vin ei incuntin vid annalisa ed encuir sligiazions per optimar il provediment d'aua, seigi da vart dalla qualitat d'aua, dalla segirtad dil provediment ni era dalla quantitat d'aua. Cura ni schebein tut ils preprojects e projects vegnan realisai ei in'autra damonda quei dependa era dil svilup da nossa vischnaunca, da pretensiuns surordinadas e buca il pli davos dallas finanzas."

Cussegl da vischnaunca

All'entschatta era ei previu da metter a disposiziun il terren mo en dretg da construcziun. Pertgei ein ins revegni a quei conclus e metta a disposiziun il terren en in sistem mischedau cun dretg da baghegiar ni la pusseivladad d'ina cumpra? Exista per quels che surprendan il terren en dretg da baghegiar la pusseivladad da comprar quel pli tard? Tgei avantatgs ha in sistem da l'auter? Exista ina declaranza davart ils interessents ch'els surbaghegian lur terren?

Suprastonza communal

La vischnaunca ha negins disavantatgs sch'il terren vegn vendius ni mess a disposiziun en dretg da baghegiar. Pil petent sa il dretg da baghegiar muntar ina levgera en connex cun la finanziaziun, sto el buca cumprar e finanziar il terren. El cass dalla vendita occuora alla vischnaunca negina lavur en connex cugl incasso d'in tscheins da construcziun. Igl ei buca previu ina declaranza che oblighescha ad ina surbaghegiada. Denton ei el cass d'ina parcella in contract suttascrets ed el secund cass succeda quei el decouors dil meins schaner 2016.

Decisiun

Cun 15 encunter 0 vuschs e neginas abstensiuns decida il cussegli da vischnaunca:

1. *da conceder per l'avertura dil quartier Caschuarz II in credit da frs. 260'000.--;*
2. *da suttametter quei conclus el senn d'art. 21, lit. c dalla constituziun communal al referendum facultativ.*

Cussegli da vischnaunca Disentis/Mustér
Il president: Igl actuar:

Edgar Durschei

Ervin Maissen



3. Agenda 2016

Cussegli da vischnaunca

L'agenda 2016 preveda 10 resp. 11 termins da sedutas. Eis ei già enconuscent tgei fatschentas che stattan sin rucca? A vesta dil fatg ch'il program d'activitat vegn tractaus il zercladur tonscha evtl. in sera per tractar il preventiv. Dils 22 entochen ils 24 d'avrel 2016 ei previu la sentupada agrara "Agrischa" a Glion. Eventualmein mauncan pliras persunas a caschun da quella seduta.

Suprastonza communal

Il preventiv 2017 vegn preparaus tenor il niev model da quen HRM2. Pervia dallas novaziuns che sedattan ordlunder vegn ei a duvrar dapli temps per la tractazion da quel. Perquei duess ins mantener las duas seras per la tractazion dil preventiv 2017. Pigl ulteriur ein suandontas fatschentas enconuscentas:

- Credit per la projectaziun per la segironza encunter malauras digl Ual d'Acletta.
- Revisiun dil regulativ da taxas tier la lescha davart igl allontanament e la purificaziun dallas auas.
- Credit pil project dalla meglieraziun funsila.

Aschinavon ch'ei sedat, eis ei pusseivel da desister d'in termin u l'auter.

Il cussegli da vischnaunca pren enconuschientscha da suandonts termins da seduta pigl onn 2016:

1. venderdis, ils 29 da schaner 2016
2. venderdis, ils 26 da fevrer 2016
3. venderdis, ils 11 da mars 2016
4. venderdis, ils 22 d'avrel 2016
quen 2015
5. venderdis, ils 10 da zercladur 2016
program d'activitat 2013-2016
6. venderdis, ils 19 d'uost 2016
seduta extra muros
7. venderdis, ils 23 da settember 2016
8. venderdis, ils 28 d'october 2016
9. gievgia, ils 17 da november 2016
preventiv 2017 e plan da finanzas
venderdis, ils 18 da november 2016
preventiv 2017 e plan da finanzas
10. venderdis, ils 9 da decembre 2016

Cussegli da vischnaunca Disentis/Mustér
Il president: Igl actuar:

Edgar Durschei

Ervin Maissen



4. Ura da damondas (conform ad art. 44 dil regulativ da fatschentas)

Suprastanza communală

Alla suprastanza communală ei vegniu inoltrau suandontas damondas a scret:

Cusseglier Flavio Murer

1. *Scala Davos Mustér*

Dapi entgin temps vegn la scala/senda da colligaziun Davos Mustér sanada da rudien. Il preventiv 2015 prevedeva buca quell'investiziun, dat ei raschun graviontas che quella sanaziun sto succeder? Cunquei che la sanaziun dil parcadi dalla claustra ei vegnius snegaus dalla populaziun, setschentan cun quella scala da colligaziun entginas damondas.

- a) Tgei motivs gravionts han schau priorisar quell'investiziun taluisa?
- b) Tgei credit ha la suprastanza communală dau per quella sanaziun?
- c) Enteifer tgei temps stat la scala puspei a disposizion?
- d) Dat ei eventualmein ina clav da repartiziun dils cuosts pils vischins?
- e) Ei il niev project accessibels per sutgas da rodas ni crotschas?
- f) Vegn montau in tschabergal?

2. *Latis/Caschuarz/Clavaniev*

Cunquei che nus arvin il quartier Caschuarz II e lein dar leu la pusseivladad a famiglias giuvnas da realisar lur siemi d'in agen suttetg, vegnel adequat al temps cun ina giesta da giavischs quei che corrispunda al temps da Nadal.

- a) Sligar la situaziun ordvart malsegira per pedunzs denter Funs-Dado (Gion Albin) e la punt sur il flum da Clavaniev cun in pign iral sco senda incl. sdrema da pedunzs.
- b) Postar duas ulteriuras cazzolas sin la Via Clis el contuorn dalla Villa Monrepos. Sche las cazzolas sin la Via da Paders ein secumprobadas, se capescha immediat duas da quellas.
- c) Presentar ils motivs ch'in vischin retscheiva buca la pusseivladad dad acquistar in pign toc prau agricol el contuorn da Caschuarz II.
- d) Motivar la Corporaziun d'aua Spina da Vin da realisar el quartier Caschuarz e Caschuarz II ina lingia da tscherchel.

Suprastanza communală

Enconuschentamein retracta ei cheu d'ina scala che porscha a vischinas e vischins in access a pei denter differents quartiers. Las rispostas secloman sco suonda:

- a) Entras in project privat d'in vischin alla Via Davos-Mustér han tut ils conducts sigl intschess da quella parcella stui vegnir dislocaj cumpletamein (Spina da Vin e Repower). La sanaziun dalla scala steva

gia daditg sin rucca, perquei ch'il betun sesligiava entras il sal ed ils uviarchels dils tumbins eran gia ruts e periclitavan ils pedunzs. Cheu era da quintar quest atun cun remeduras ell'altezia da rodund frs. 8'000.-- entochen frs. 10'000.--.

Cunquei che la Repower ha gest stuii colligiar egl intschess dalla scala sia lingia (ils vischins han gest lubiu da tschentlar ina nova cabina da repartiziun), eis ei sedau sinergias che han lubiu da realisar la scala per in prezi favoreivel.

- b) Il credit per la scala munta a frs. 45'000.--. Il project e la survigilonza caschunan negins cuosts!
- c) El decuors dall'jamna 51 stat la scala puspei a disposiziun als pedunzs.
- d) La scala ei completemein en possess dalla vischnaunca. El cass da stabiliments dil traffic plaun ha la vischnaunca entochen ussa buca menau atras proceduras da contribuziun.
- e) La scala ei vegnida remplazzada ella medema fuorma sco quei ch'ella era avon maun oz (sanazion). Entras la nova senda enviers Chischliun e la Via Cavardiras ei igl access daus sin tuts mauns.
- f) Ei vegn montau in tschabergal, denton mo dad ina vart per spargnar cuosts.

2. *Latis/Caschuarz/Clavaniev*

- a) Ina sdrema da pedunzs vegn la polizia da traffic muort la vesta buca a lubir. Pusseivel fuss evtl. da realisar ina senda per liung dalla Via Clavaniev. Quels cuosts vegn la vischnaunca denton a stuer surprender persula.
- b) L'installaziun da duas cazzolas caschuna cuosts da rodund frs. 14'000.- Vidlunder vegn la colligiaziun cun la reit electrica che caschuna ulteriurs cuosts da ca. frs. 30'000.--. Las cazzolas alla Via da Paders ein vegnidas installadas per ina fasa d'emprova. Aschinavon che quellas duessen secumprovar, san ins trer en consideraziun d'installar ulteriuras cazzolas.
- c) Il vischin pertuccau ei vegnius orientaus dalla suprastanza communal da spargnar ils cuosts per ina mutaziun ed ils cuosts dil cudisch funsil, perquei che quei terren cun ina relativ pintga surfatscha sa vegnir adossaus ad el en connex cun la meglieraziun funsila. Quei vegn pil vischin considerablamein pli favoreivel.
- d) Quella damonda ei vegnida rispondida sut tractanda 2 (pagina 6).

Cusseglier Edgar Durschei

Concernent surdar il menaschi ad in'interpresa sco SENIOcare AG cun sedia a Wattwil.

"Sa la fundaziun decider persula aschia in pass? Ei quei el senn dalla vischnaunca sch'ins patratga vid plazzas da laver ell'administraziun, gudogns che vegnan pagai da nus e transportai giu la Bassa enstagl il cuntrari? Fuss meglier sche la fundaziun resp. la PUNTREIS SA prendess en la funcziun da SENIOcare e mass sin la tacherca dad outras casas per administrar. Denton da cheu anora e buca da Glion, Cuera ni Wattwil. Transportar devisas si tier nus e buca engiu. Ha la vischnaunca deponiu sia posiziun al cussegli da fundaziun ni ponderescha ella da far quei?"

Suprastonza communal

La structura da sanadad ei organisada sco suonda:

- La regiun da sanadad Sursassiala (representants da suprastonza) ha fatg ina cunvegna da prestaziun cun la fundaziun PUNTREIS.
- La fundaziun PUNTREIS ha fatg ina cunvegna da prestaziun cun PUNTREIS center da sanadad SA (proprietad edifecis resta e suletta acziunara).
- La PUNTREIS center da sanadad SA ei responsabla pil menaschi.

Il cussegl d'administraziun en collaboraziun cun la fundaziun PUNTREIS examinescha pliras variantas. Denton ston aunc pliras damondas vegnir sclaridas avon ch'ina decisiun ei madira. La decisiun finala co organizar il menaschi schai tier la fundaziun PUNTREIS.

Examinadas vegnan suandontas sligiaziuns pusseivlas:

- Ina sligiaziun persula.
- Ina collaboraziun cun tuttas casas da tgira dalla Surselva.
- La surdada dil menaschi all'interresa SENIOCare.

La regiun da sanadad ei vegnida informada entras la fundaziun ed il cussegl d'administrzaiun dalla PUNTREIS center da sanadad SA.

La suprastonza communal vegn a plassar quellas ponderaziuns giustificadas alla fundaziun PUNTREIS.

Formalmein e giuridcamein ei la fundaziun PUNTREIS independenta concernent la decisiun. La suprastonza communal ei perschuatida ch'il cussegl da fundaziun pren, suenter haver examinau detagliadamein las variantas, ina decisiun cun prudentscha.

Cusseglier Wendelin Jacomet

En la Quotidiana dil venderdis hiel giu caschun da leger in fetg bien artechel "Ina visiun empermettenta stulida". Ei ha dau dapi ils onns '70 entgins projects stradals e viafierils en Surselva. Jeu havevel aunc mai udiu d'ina via directa Glaruna-Surselva sur Pigniu.

Ina via directa denter la Surselva e La Punt, lu la varianta Y dalla viafier da Trun encunter il sid e la Porta Alpina. Tut quels projects han fatg naufragi ed ein setschentai en truchet. Ins ha l'impressiun che nus dalla Surselva vegnin buca pri serius. Tgisà, forsa che nus desistin magari memia spert.

Dapi l'informaziun publica dils 12 da matg 2015 ella sala Peter Kaiser sin Clastra havein nus udiu nuot dil project cun la varianta d'in tunnel da via "Alpsu Sedrun – Amsteg".

Con lunsch ein las tractativas da quei project? Ha ei dau ina seduta suenter ils 12 da matg 2015 denter ils presidents communals da Medel, Tujetsch e Mustér cun cusseglier guovernativ Mario Cavigelli sco quei ch'igl ei vegniu giavischau dils iniziants da quei project?

Vegn era quei project a restar sulettamein ina visiun e setschentar en truchet, stuein nus veramein anflar in'alternativa e quella ei il Pass dil Lucmagn. Nus savein che quella varianta ei realisabla. Seigi quei cun meglierar la segirtad sco era muort raschuneivels cuosts.

Perquei supplicheschel jeu da planisar ton pli spert ina seduta cun il niev eligiu president dalla Pro Lucmagn, cusseglier naziunal Martin Candinas, cusseglier guovernativ Mario Cavigelli ed ils presidents communals da nossas treis vischnauncas per saver agir en caussa. Medemamein

giavischel jeu ch'il cussegli da vischnaunca vegni informaus da temps en temps en caussa.

Suprastanza communal

Ils presidents communals da Mustér e Medel han tematisau il project cun cusseglier guovernativ Mario Cavigelli. Il cantun ha priu enconuschiantscha dil project. Sebasond sin las discussiuns occurridas ed en coordinaziun cul cau dil departament han las vischnauncas dalla Cadi suttamess ina brev cul giavisch da prolongir la gallaria Scopi sco era da sanar il tschancun denter Platta ed il Pass Lucmagn (cunzun las gallarias existentas). Cusseglier naziunal Martin Candinas ei sebasond sin quella brev en direct contact cun la Regenza ed il departament da construcziun bassa. Ins quenta cun cuosts da rodund 40 milliuns francs. El decuors dalla primavera 2016 duein emprems resultats esser sin meisa.

Cussegli da vischnaunca

L'organisaziun da salvament 144 ha visau il contract cun il spital da Glion e scriva ora da niev quellas lavurs. Ei fuss indicau sche la suprastanza communal savess intimar in'organisaziun en vischnaunca che s'interessass per quell'incarica. Localitads vitas per in'organisaziun da quei gener stessen a disposiziun el baghetg dall'antieriura stampa.

Quest'jamna han ins intervegniu che la regenza Grischuna hagi affittau sur pli liung temps il Hostel Cucagna sco alloschament per fugitivs. Cun tgei consequenzas sto la vischnaunca quintar cheu?

En connex cun l'embellaziun dil vitg han ins fatg in muster cun ina marcaziun amiez il vitg sco lingia da scuntrada denter il traffic motorisau ed il traffic plaun. A vesta ch'il Nani-Bazar ei venals fuss ei indicau d'acquistar quel per meglierar la situaziun dil passapei.

A Pardomat han ins constatau che la turbina nova dall'Ovra Russein caschuna immissiuns da canera. Eis ei pusseivel ch'ins sa intervegnir cheu?

Suprastanza communal

Vegn a scalar la damonda pertucont pussevladads per offerir l'incarica pils survetschs da salvament 144. Igl ei denton impurtont da s'engaschar per ch'ins pericleteschi buca l'esistenza dil spital a Glion. Ei il spital gie in'impurtonta petga per nossa regiun.

La situaziun concernent ils fugitivs ha la suprastanza communal enderschiu pér suenter che las decisiuns sin palancau cantunal eran pridas. La situaziun dils fugitivs ei ina tragedia humanitara alla quala era nus vegnin a stuer contribuir ina part. Il fatg ch'il baghetg sesanfla amiez il vitg ei buca agreabels. La suprastanza communal metta peisa ch'ei vegn el futur communicau transparentamein. Ulteriuramein vegn installau ina grappa accumpignonta cun representants dil cantun, dalla vischnaunca e dil menaschi. En quei connex animescha la suprastanza communal vischinas e vischins da retschercar igl emprem la derivonza dallas persunas che vulan affittar habitaziuns avon ch'affittar quellas. Tenor situaziun ha la vischnaunca da surprender silsuenter las consequenzas en connex cun susteniments socials, quei ch'ei cumbinau cun grevezias finanzialas supplementaras.

Tenor indicaziun dalla Regenza duess ei pil mument buca dar ulteriurs centers da fugitivs en Surselva. Denton facilitescha la situaziun sin la fiera d'immobilias en Surselva tals centers, perquei che cheu stattan quellas a disposiziun pli favoreivel ch'en l'Engiadina. En mintga cass eis ei impurtont d'insister che quella situaziun cun ils fugitivs astga buca caschunar cuosts alla vischnaunca.

La suprastonza communal vegn a sefatschentar dalla fatschenta concernent in evtl. acquist dil baghetg dil Nani-Bazar.

Pertucont la canera a Madernal/Pardomat vegn la suprastonza communal a tschercar ina sligaziu.

Ulteriuramein ha il survigilader da prezis communicau quest'jamna ch'igl alzament dallas taxas pigl allontanament e la purificaziun dallas auas stetti en rama e seigi ord siu pugn da vesta giustificaus.

Martin Candinas, niev president della Pro Lucmagn, tgira in bien contact cul cantun. Actualmein regia cheu buna accoglientscha concernent ils projects per l'avertura dil Pass Lucmagn. La situaziun ei era semeglierada davart dil cantun Tessin nua ch'ei vegn ad esser pusseivel da sittar lavinas quest unviern.

Il cussegl da vischnaunca da Tujetsch ha approbau il preventiv 2016 cun la contribuziun a Sedrun Mustér Turissem. Actualmein vul la vischnaunca da Tujetsch signar la cunvegnentscha da prestaziun mo provisoriamein pigl onn 2016. Per la vischnaunca da Mustér ei quei denton buca ina sligazion cuntenteivla, tonpli ch'ei sa buca esser ch'ins discuora mintg'onn davart quella cunvegnentscha.

Cussegl da vischnaunca Disentis/Mustér
Il president: Igl actuar:

Edgar Durschei

Ervin Maissen



5. Elecziuns:

5.1 dil president ni dalla presidenta dil cussegli da vischnaunca per 2016

President dil cussegli da vischnaunca

Propona Livio Zanetti, actualmein vicepresident dil cussegli da vischnaunca, sco president pigl onn 2016.

Elecziun

Votaziun per scrutini

Cedels reparti	15
Cedels returnai	15
Cedels vits	1
Cedels valeivels	14
Vuschs da candidats	14
Pli absolut	8

Cun 14 vuschs ei cusseglier Livio Zanetti eligius sco president dil cussegli da vischnaunca pigl onn 2016.

Cusseglier Livio Zanetti, president dil cussegli da vischnaunca per igl onn 2016

"Avon biebein quater onns sun jeu vegnius dumandaus, sch'jeu havessi buca interess da candidar per il cussegli da vischnauncha. Cun reflectar - tgei ch'jeu duei far, sundel vegnius alura tier la conclusiun da star a disposiziun. Forsa cun gronda fortuna han vischinas e vischins da Mustér eligiu mei el cussegli da vischnaunca. Buca da crer per mei. In Puschlavín, carschius si en l'Engiadina, vegn eligius a Mustér. Tgei che quei vul dir, ei spert stau clar per mei. Ina sfida cun la lingua, esser promts per consens e segiramein esser sut ina certa controlla. Ina damonda ch'ei spert vegnida endamen era; Vegn jeu d'ademplir quellas pretenisuns? Vegn jeu d'ademplir las speronzas che vegnan fatgas dils vischins? Essan nus sincers - buc'adina. Avon in onn haveis Vus cussegliers e cussegliers tscharniu mei sco vicepresident. Oz haveis Vus decidiu da surdar a mi il presidi.

Igl ei buca adina sempel per mei. Discuorer in lungatg empau jester ed aunc far ina buna figura. Argumentar e cattar ils dretgs plaids adequats e quei senza permalar. Quei ei claramein ina via per s'integrar e per emprender supplementarmein da niev vitier. Jeu less en mintga cass nezegiar quella schanza.

Cun segirtad vegnel jeu buca a discuorer perfetgamein sursilvan. Segiramein vegn jeu forsa a far in u l'auter sbagl cun empalar il cussegli. Jeu sperel denton vinavon cun Vossa capientscha e Vies sustegn.

Segiramein vegn il cussegli a menar bunas discussiuns e prender bunas decisiuns per Mustér.

Isa pero le ura da sara gio li paroli, - i discors e da va ringrazia par al sustegn ca mef dait.

Un grand ingraziament, - al ga va, a mia familia, i ma tegna sempri libar la scena per pude fa politica e par tüti li attivita, sias, par esempi cul cor d'instrutur da pumpier svizzar.

Ussa eis ei uras da callar culs plaids, serrar il discours e d'engraizar a Vus per Vies sustegn e Vossa confidonza. In grond engraziament less jeu admetter a mia famiglia, che possibilitescha tut mias activitats, p. ex. far politica, u era miu engaschi tier il corp svizzer d'instructurs da pumpiers. En quei senn declarel d'acceptar l'elecziun".

5.2 dil vicepresident ni dalla vicepresidenta dil cussegl da vischernaunca per 2016

Cusseglier Adrian Pally

Propona cusseglier Christoph Berger sco vicepresident pil cussegl da vischernaunca pigl onn 2016. Christoph Berger ei s'engaschaus sin differents secturs culturals sco president dil comite d'organisaziun per la fiesta centenara dalla Viafier retica, sco commember e president dall'Uniun da fallun e mulin a Disla mo era sco cusseglier da vischernaunca e sco pumpier.

Elecziun

Votaziun per scrutini

Cedels reparti	15
Cedels returnai	15
Cedels vits	2
Cedels valeivels	13
Vuschs da candidats	13
Pli absolut	7

Cun 12 vuschs ei cusseglier Christoph Berger eligius sco vicepresident dil cussegl da vischernaunca pigl onn 2016.

Cusseglier Christoph Berger, vicepresident dil cussegl da vischernaunca per igl onn 2016

Engrazia per l'elecziun e declara d'acceptar quella.

President dil cussegl da vischernaunca

La proxima seduta dil cussegl da vischernaunca ha liug venderdis, ils 29 da schaner 2016. Plinavon fa el attents sin entginas occurrentzas che han liug duront il temps d'advent e da Nadal.

Pendenzas

Fatschenta/Sparta	Termin	Responsabel	Remarcas
Informaziun dalla populaziun davart la politica da tgira	Ils 24 d'avrel 2015	Geraua Cecilia Maissen	
Survesta davart ils cuosts en connex culs donns d'uaul. Risposta el decours dil meins d'avrel 2016	Ils 21 d'uost 2015 Ils 9 d'octobre 2015 Ils 20 da novembre 2015	President communal Geraua Cecilia Maissen	

Cussegl da vischnaunca Disentis/Mustér
Il president: Igl actuar:

Edgar Durschei

Ervin Maissen

Disentis/Mustér, ils 19 da decembre 2015

G:\Uffici baghegier\Cussegl da vischnaunca\Cussegl da vischnaunca 2013_16\Protocols\Cus0016_27.docx